

In gieu interactiv davart l'integraziun

S'avischinar al tema da l'immigraziun cun agid d'in gieu

■ (cp) **La SRG SSR idée suisse ha lantschà ier gievgia, ils 27 da mars 2008, diesch dis avant l'entschatta da l'emna tematica «wir anderen – nous autres – noi altri – nus auters», in gieu interactiv captivant cun il num «Nus auters – il gieu».** Il gieu

«Nus auters – il gieu», ch'è disponibel a partir dals 27 da mars sin tut las paginas Web da las unitads d'interpresa da la SRG SSR, è vegnì sviluppà aposta sco contribuziun multimediata per l'emna tematica da la SRG SSR davart l'integraziun (5 – 13 d'avrigl 2008). Il giugader gioga en ina Svizra virtuala ed agescha d'ina vart sco interprendider e da l'autra vart sco minister da l'economia. Cun sias acziuns po el manar cun success ils otg secturs economic definids e contribuir uschia al svilup da ses pajais. Il gieu sa basa surtut sin las datas statisticas da l'onn 2007 da l'Uffizi federal da migraziun. Per render il gieu pli interessant ed augmentar il plaschair da giugar èn tschertas cundiziuns e cifras fixadas ordavant. Il gieu na pretenda perquai betg d'esser facticamain cumplet. Tuttina mussa el a moda impressiunanta quant interessant ed a medem temp difficil ch'igl è da contribuir al success economic d'in pajais, resguardond las pli diversas influenzas.

Da l'integraziun profitan tuts

Il gieu da la SRG SSR mussa a moda ludica ch'ils pajais industrials bainstants n'èn betg mo dependents da l'immigraziun da forzas da lavur specialisadas, mabain ch'els profitan era da las lavurantas e dals lavurants main qualifitgads. Entant ch'ils pajais bainstants disponan da dapli chapital e tecnologia, han ils pajais pli paupers in pli grond potenzial da forzas da lavur. Sch'ils pajais ritgs permettessan damai a las estras ed als esters d'immigrar libramain, fìss quai per els tenor il pensar ricardian (tenor David Ricardo, il represchentant da l'economia naziunala classica) in cler avantatg. E quai betg mo perquai ch'ils immigrants surpiglian per regla lavurs pajadas main bain, che na vegnan betg exequidas gugent dals indigens. Mabain era perquai ch'els prestan cun ils daners ch'els tramettan a chasa ina gronda contribuziun a l'agid en svilup.

Descripziun dal gieu

«Nus auters»: Crear in martgà da lavur equilibrà

Sco interprendider po il giugader plazzar las lavurantas ed ils lavurants disponibels sin il martgà da lavur a moda uschè ideala sco pussaivel en ils secturs economic. El po spustar il personal d'in sector a l'auter u relaschar las personas

tut tenor il svilup economic. El sto adina empruvar da reparter las personas tenor lur abilitads e cuntanscher ina relaziun armonica tranter ils indigens ed ils immigrants. La finala po el er influenzer il nivel da las pajas en ils secturs economic e prender mesiras da motivaziun. Tut quests parameters han in'influenza directa sin il success u il nunsuccess pervi dals custs pli auts u da las fluctuaziuns.

Promover las mesiras d'integraziun

Sco minister da l'economia po il giugader promover en ils singuls secturs economic mesiras che megliereschan la chapientscha vicedaivla tranter las lavurantas ed ils lavurants activs en quests secturs. Quai è surtut curs per promover las enconuschientschas linguisticas e mesiras per ina meglra chapientscha per la cultura.

Cura ch'il giugader ha preni tut las decisiuns terminescha el il mais virtual. Ils parameters vegnan elavurads ed il success economic dal pajais vegn calculà e preschentà da nov. En il proxim mais ha il giugader la pussaivladad da far adattaziuns u da reagir sin la nova situaziun al martgà da lavur. Il spazi da temp virtual maximal dal gieu è 10 onns.